

UDHËZIM
Nr.3912, datë 21.6.2004

MBI PROCEDURAT PËR PËRBALLIMIN NGA SHTETI TË SHPENZIMEVE TË SHËRBIMIT TË VARRIMIT PËR SHTETASIT SHQIPTARË, QË VDESIN BRENDA DHE JASHTË SHTETIT

Në zbatim të nenit 102 pika 4 të Kushtetutës dhe të vendimit nr.426, datë 9.7.1998 të Këshillit të Ministrave “Për përballimin e shpenzimeve të shërbimit të varrimit për shtetasit shqiptarë, që vdesin brenda dhe jashtë shtetit ” ndryshuar me vendimin e Këshillit të Ministrave nr. 788, datë 26.11.2003 “Për disa ndryshime në vendimin e Këshillit të Ministrave nr.426, datë 9.7.1998 “Për përballimin e shpenzimeve të shërbimit të varrimit për shtetasit shqiptarë, që vdesin brenda dhe jashtë shtetit””, Ministri i Rregullimit të Territorit dhe i Turizmit dhe Ministri i Financave

UDHËZOJNË:

Neni 1

Qëllimi i këtij udhëzimi është përcaktimi i procedurave për përballimin nga shteti të shpenzimeve të shërbimit të varrimit për shtetasit shqiptarë, që vdesin brenda dhe jashtë shtetit, përcaktimin e rasteve të veçanta, si dhe përcaktimin e masës së kontributit në rastet kur shpenzimet e transportit përballohen nga familjarët e të ndjerit.

Neni 2

Buxheti i Shtetit për çdo rast fatkeqësie jep, për shtetasit shqiptarë, një ndihmë të caktuar në lekë. Masa e kësaj ndihme përcaktohet sipas vendbanimit në zona rurale apo urbane, si dhe specifikohet për grup-moshat 0-14 vjeç dhe mbi 14 vjeç, sipas listës bashkëngjitur vendimit të Këshillit të Ministrave nr.426, datë 9.7.1998.

Neni 3

Ndihma në lekë tërhiqet nga të interesuarit pranë zyrës së financës në bashkinë apo komunën përkatëse kundrejt paraqitjes së certifikatës së vdekjes së të ndjerit me shënimin “Shpenzime varrimi”.

Për çdo rast pagese, financa e bashkisë apo e komunës, sipas certifikatës së paraqitur, llogarit masën e ndihmës, si dhe plotëson mandatpagesën.

Neni 4

Shpenzimet për ndihmë planifikohen në buxhetin e Ministrisë së Rregullimit të Territorit dhe të Turizmit dhe përdoren mbi bazën e kërkesave të organeve të pushtetit vendor.

Neni 5

Ministria e Rregullimit të Territorit dhe e Turizmit, me fonde të Buxhetit të Shtetit, organizon shërbimin e transportit të kufomave dhe të eshtrave vetëm për rastet e fatkeqësive të ndodhura jashtë territorit të vendit, për persona që janë dërguar me shërbim ose mjekim shëndetësor nga shteti, punonjësit e përfaqësive diplomatike, si dhe për raste të veçanta, sipas kërkesës së bërë nga institucione, njësi të qeverisjes vendore apo shoqata të ndryshme.

Transporti i kufomave dhe eshtrave për kategoritë e cituara më sipër bëhet me automjetet e funeralit që ka në inventarin e saj Ministria e Rregullimit të Territorit dhe e Turizmit. Të gjitha shpenzimet e transportit ku përfshihen karburante, dietat për drejtuesit e automjetit, taksat e ndryshme kufitare dhe ato të lëvizjes, telefonatat e dokumentuara, biletat e tragetit, fjetja etj. përballohen nga buxheti i Ministrisë së Rregullimit të Territorit dhe të Turizmit.

Neni 6

Shpenzimet e tjera, si: shpenzime spitali, morgu, zhvarrosje, arkivoli, si dhe detyrime të tjera

për përgatitjen e kufomës për transportimin në atdhe, përballohen nga familja apo të afërmit e të ndjerit.

Neni 7

Ministria e Rregullimit të Territorit dhe e Turizmit do të nisë automjetet për transportimin e kufomës apo eshtrave vetëm pas kërkesës zyrtare nga zyra konsullore pranë Ministrisë së Punëve të Jashtme, e cila duhet të sqarojë në kërkesën e bërë gjeneralitetet dhe vendndodhjen e saktë të të ndjerit, shlyerjen e detyrimeve përkatëse nga familjarët, përfundimin e procedurave që lejojnë transportin në Shqipëri.

Neni 8

Për shtetasit shqiptarë, që vdesin jashtë territorit të Republikës së Shqipërisë, kur shpenzimet e transportit përballohen nga familjarët e të ndjerit, Buxheti i Shtetit rimbursen një pjesë të këtyre shpenzimeve, llogaritur me tarifën 70 lekë/km nga qendra administrative ku ka ndodhur vdekja deri në qendrën administrative ku do të bëhet varrimi.

Neni 9

Për transporte të kryera nga vende jashtë Europës, shlyerja do të bëhet në masën 1500 dollarë. Kjo pagesë do të bëhet me lekë duke konvertuar valutën e huaj me kursin zyrtar ditën që plotësohet çeku për pagesë.

Neni 10

Pagesa e familjarëve do të bëhet nga Ministria e Rregullimit të Territorit dhe e Turizmit kundrejt këtyre dokumenteve :

- a) Dokumenti i vdekjes nga shteti ku ka ndodhur vdekja .
- b) Faturë, biletë apo dokument tjetër, që vërteton se shpenzimet e transportit i kanë kryer familjarët apo të afërmit e të ndjerit.
- c) Vërtetimin e varrimit në Shqipëri .
- d) Certifikatë vdekje nga zyra përkatëse e gjendjes civile në Shqipëri.
- e) Letërnjoftimin ose fotokopje e noterizuar e familjarit që do ta tërheqë shpërblimin.

Dokumentacioni i mësipërm duhet të jetë origjinal ose kopje e noterizuar. Dokumentacioni në gjuhë të huaj të jetë i përkthyer në shqip dhe i noterizuar.

Neni 11

Masa e pagesës të tërhiqet pranë Ministrisë së Rregullimit të Territorit dhe të Turizmit brenda një viti nga dita e sjelljes së kufomës në Shqipëri.

Në rastet kur shpenzimet e transportit për sjelljen e kufomës apo eshtrave në Shqipëri kryhen falas nga shteti përkatës apo shoqata të ndryshme, familjarët e të ndjerit nuk përfitojnë pagesë të transportit nga shteti shqiptar.

Neni 12

Këshillat e qarqeve, bashkitë ose komunat, nga buxheti i tyre, përballojnë heqjen, transportimin dhe rivarrimin e eshtrave të të ekzekutuarve, me ose pa vendim gjyqi, të burgosurve politikë, që kanë vdekur në burg ose në vendet e dënimit, pa u dënuar.

Për kryerjen e punimeve përkatëse, këshillat e qarqeve, bashkitë ose komunat ngarkojnë njësi të shërbimit që kanë në vartësi, të cilat përpilojnë dokumentacionin përkatës (faturë, situacion etj.) për shpenzimet e kryera në fakt. Në bazë të këtij dokumentacioni bëhet dhe financimi i tyre.

Neni 13

1. Rastet e veçanta, për të cilat me fonde të Buxhetit të Shtetit organizohet shërbimi i transportit të kufomave dhe eshtrave, konsiderohen këto kategori personash:

- Personalitete të shquara të artit, mbajtës i titullit “Artist i Popullit”.
- Personalitete të shquara të shkencës, mbajtës i titullit “Profesor”.
- Personalitete të shquara të sportit, mbajtës i titullit “Mjeshtër sporti”.
- Invalid dhe veteranë të Luftës Nacionalçlirimtare.
- Persona me aftësi të kufizuar.

Propozimet për organizimin e shërbimit të transportit të kufomave dhe të eshtrave për personat e lartshënuar bëhen nga institucione qendrore, njësi të qeverisjes vendore apo shoqata të ndryshme ku ata bëjnë pjesë dhe miratohen nga Ministri i Rregullimit të Territorit dhe i Turizmit.

Neni 14

Udhëzimi i përbashkët i Ministrisë së Rregullimit të Territorit dhe të Turizmit me nr.4252/1, Ministrisë së Financave me nr.2125/4 shfuqizohet.

Neni 15

Ky udhëzim hyn në fuqi pas botimit në Fletoren Zyrtare.

MINISTRI I RREGULLIMIT TË TERRITORIT
DHE TË TURIZMIT
Bashkim FINO

MINISTRI I FINANCEVE
Arben MALAJ

LISTA E RRETHEVE TË GRUPUARA SIPAS MASËS SË NDIHMËS NË RAST FATKEQËSIE

Nr.	Rrethi	Zonat urbane		Zonat rurale	
		0-14 vjeç	Mbi 14 vjeç	0-14 vjeç	Mbi 14 vjeç
I	TIRANA	5800	9600	2200	3600
II	SHKODËR	5000	8400	2200	3600
	DURRËS	5000	8400	2200	3600
	ELBASAN	5000	8400	2200	3600
	VLORE	5000	8400	2200	3600
	KORÇË	5000	8400	2200	3600
	FIER	5000	8400	2200	3600
	BERAT	5000	8400	2200	3600
	GJIROKASTËR	5000	8400	2200	3600
	KAVAJË	5000	8400	2200	3600
	KRUJË	5000	8400	2200	3600
	LEZHË	5000	8400	2200	3600
	LUSHNJË	5000	8400	2200	3600
	POGRADEC	5000	8400	2200	3600
	SARANDE	5000	8400	2200	3600
III	DIBËR	4300	7200	2200	3600
	GRAMSH	4300	7200	2200	3600
	KOLONJË	4300	7200	2200	3600
	KUKËS	4300	7200	2200	3600
	KURBIN	4300	7200	2200	3600
	LIBRAZHD	4300	7200	2200	3600
	MIRDITË	4300	7200	2200	3600
	MAT	4300	7200	2200	3600
	PËRMET	4300	7200	2200	3600
	PUKË	4300	7200	2200	3600
	SKRAPAR	4300	7200	2200	3600

	TEPELENË	4300	7200	2200	3600
	TROPOJË	4300	7200	2200	3600
	BULQIZË	4300	7200	2200	3600